

PAUL ENEÑERE MME NDUTIME KE CORINTH

1 Nwedi Corinth 12:1-31; 14:1-40.

ỌYỌHỌ UKPEP-ŃKPỌ 392

Eke Ikpọ Owo

IKỌ IBUOT: “Ke erinam kpukpru, eyom ńkọri ufọk Abasi” (1 Nwedi Corinth 14:26).

I Edinim Udia Ọbọń

1 Ekenyene nditre kpukpru ndutime ye ido eke mifonke ke edidia Udia-Ọbọń, 1 Nwedi Corinth 11:18-22.

II Mme Enọ Eke Etode Edisana Spirit Ke Ikpohidem Christ

1 Mme nsio-nsio enọ edu, edi enọ kpukpru eto ke Edisana Spirit, 1 Nwedi Corinth 12:1-11; Nwedi Mbon Ephesus 4:11-13; Nwedi Mbon Rome 12:3-8.

2 Ediwak ndido edu ke ikpohidem Christ, mmọ kiet-kiet enyene ufon ye akpan utom, 1 Nwedi Corinth 12:12-31.

III Mme Usem Ye Editiń Mme Ntiń-nnim Iko ke Ufok-Abasi

1 Paul ama onọ Ufok-Abasi item abana edida enọ mme usem nnam ńkpọ, 1 Nwedi Corinth 14:1-28.

2 Editiń ntiń-nnim iko ofon akan edisem usem, 1 Nwedi Corinth 14:24, 25.

3 Mme anditiń ntiń-nnim iko ekenyene ndinam ntre nte ofonde, idighe ke ndutime, 1 Nwedi Corinth 14:26-33, 36-40.

4 Owo ikonyimeke iban enam ndutime ke ini mboho, 1 Nwedi Corinth 14:34, 35.

SE EKPEPDE EBAÑA

Udia Ọbọń

Ke Corinth, mmọ ema emehe ke ndibem iso ndia udia ke otu mbemiso mmọ edidia udia Ọbọń emi ekedide edibuń uyo nte emi Jesus akanamde ye mbet Esie. Edinam emi ama ada mmọ okosim ke idiok uwem, ndien mme owo ema ekabare edioke iton ke mme udia otu oro. Ke akpaniko, oruk ńkpọ ntre ikpakanaha nte ada itie ke ufok-Abasi. Ama eneñere otim odioke ke ndinam oruk ńkpọ oro mbemiso mmọ ebuana ke edinim ewuhọ emi abanade Udia Ọbọń emi ekedide nditi mbańa uwa Christ ke ndifen utọ idiok-ńkpọ oro.

Paul ama onọ uyo ete ke mmọ ekpenyene ndidia udia ke ufok, man ke ini mmọ edude otọ kiet ndidia Udia Ọbọń mmọ ekpekeme ndinim esit mmọ nno edisana edinam emi. Ke ini Jesus okotonode Udia Ọbọń emi, Enye okodohọ ete, “Koro adana ini nte edadia uyo emi enyun enwon cup emi, mbufo ekworọ mkpa Ọbọń tutu Enye edi” (1 Nwedi Corinth 11:26). Edi ini ndikere mbańa akamba nwa-idem oro Ọbọń akawade ke abana nnyin ye oson-urua Iyip oro Enye okoduokde man efen mme idiok-ńkpọ. Ke ukem ini ntre, nnyin inyene ndise eriton ntak ndi Esie inyun itim esit nnyin inim ibeńe ńkpọ-ntibe oro. Paul ama onọ ntot ete edieke owo onwonde kop Ọbọń ke usun eke midotke, oro edi ye idiok-ńkpọ ke esit, mmọ edia enyun enwon ubiomikpe enọ idem mmọ. Ediwak owo ke Ufok-Abasi ema emem ke mbuotidem enyun edonọ ke ikpohidem koro mmọ ekediade ke ido eke midotke.

Ke nnyin ibuanade ke edinam Udia Ọbọń ke ido eke odotde, inyun ifioke ite ke edi Ikpohidem ye Iyip Christ, nnyin iyekop odudu ke spirit ye ke ikpohidem. Ediwak owo ebọ ukok udonọ ke obukidem ke ini mmọ ebuade ke Udia Ọbọń, nte mmọ esuk ekerede se Iyip Jesus qworode onọ mmọ. Iyip Jesus eke dep erifak nnyin, eyet esit nnyin, onyun onọ nnyin erikok. “Edi enye akada unan abana mme idiok ido nnyin, anuaha abana mme ukwan-ńkpọ nnyin: ufen odorọ enye ke idem man nnyin ikut emem; ndien inia Esie okok nnyin” (Isaiah 53:5). Kpukpru mme edidon emi ekeme ndinyene nnyin, edieke isanade nte Ọbọń amade.

Mme Ndido Ke Ikpohidem Christ

Ndutime ama odu ke ufok-Abasi ke Corinth ke abaña mme idaha utom kiet-kiet, edi Paul ama odomo ndiwut mmọ nte ke owo kiet-kiet enyene utom esie ndinam; ndien edieke enye anamde akpanikọ ke oro, enye eyebo anyanya uwem. “Enọ owo kiet ikọ ọniọñ, oto ke Spirit; enyuñ enọ enye eken ikọ ifiok, kpa ke Spirit oro; enọ owo efen mbuqtidem, ke Spirit oro; enyuñ enọ enye eken ukeme ukok-udonọ, kpa ke Spirit kiet oro” (1 Nwedi Corinth 12:8, 9). Ema ebat mme enọ ye mme utom eken nko, edi ke utit ekedo ete ke kpukpru ekpenyene ndinam utom nto ke ukem Spirit, emi onode owo kiet-kiet nte uduak Spirit edide.

Paul ama ada nsio-nsio utom emi ndido idem owo anamde owut nsio-nsio utom emi ndido idem Christ anamde. Edide nnyin idi mme Jew me owo mme Idut (Gentile), ifiokde nwedi me ifiokke, idide mmeme me ikopde odudu ke ikpohidem, idaha kiet ekededi eke nnyin idade ke nkan ikpohidem, ke ini nnyin imanade iduk ke ubon Abasi, Spirit onim nnyin uduok-mmọñ esin ke idem kiet, emekeme ndida nnyin enam nkpo ndimenerere ubon Abasi ke usuñ kiet me eken. Abasi enyene utom onọ owo kiet-kiet ndinam; ndien edieke owo anamde akpanikọ ke utom oro, enye eyebo utip esie.

Abasi imekke owo ndinam utom Esie nte owo ekpemekde. Enye isehe owo okpo-iso, edi ese esit. “Edi Abasi ekemek nkpo oro edide ndisime ke ererimbot man Enye esuene mbon eti ibuo; Abasi okonyuñ emek nkpo eke edide mmeme ke ererimbot man Enye esuene mkposon nkpo, ... mbak owo baba kiet edibure mbure ke iso Abasi” (1 Nwedi Corinth 1:27, 29).

Edieke kpukpru owo eke edo ete inam utom ino Obon ekpenamde ke abaña ubon Abasi ikpon-ikpon, ubahare ikpoduhe ke ufok-Abasi. Baba owo kiet ikpanwanake ndiyom akamba itie nkan owo efen. Sia enye enyenede akamba mbiomo ke esit esie ke abaña erinyaña ukpon mbon efen, enye idikereke ibaña idem esie me ndidomo ndimenerede idem esie. “Mmọdo ndien, sia osode odon mbufo ndinyene enọ eke Spirit, eyom uwak enọ eke Spirit emi edinamde ufok-Abasi okori ke ifiok.” Abasi akpakam anwam nnyin ndinam kpukpru se inamde ke ntak edibon Obio Ubon Christ!

Ndisem Nsio-nsio Usem

Kiet ke otu mme enọ emi Edisana Spirit onode Ufok-Abasi ekedi enọ edisem nsio-nsio usem. Edinam Spirit Abasi emi, ekedi ukeme owo emi okode enye ndisem ke mme usem emi enye mikodiokke ke ini Spirit Abasi okode enye ukeme ndinam nte. Enyene ndidi nnen-nnen ikọ eke mme owo efen efiokde enyuñ etiñde, idighe otime-otime edisem usem eke baba owo efen ke ererimbot mifiokke se owode. Paul ama etiñ se Isaiah ekewetde ke ini enye okode ete: “Jehovah odode ete, Nyeda mmọ emi esemde esen usem ye mkpok-inua isen owo etiñ nkpo ye mbio emi; edi kpa ke ini nnamde ntem, mmọ idikopke uyo Mi” (1 Nwedi Corinth 14:21). Mme owo emi miyomke akpanikọ Abasi idikabakere esit ito ke mme utibe-nkpo Abasi.

Ntiense Ke Abaña Uduok-mmọñ Edisana Spirit

Enọ edisem ke nsio-nsio usem edi isio-isio nkpo ye ntiense emi Edisana Spirit onode ke ini owo obo uduok-mmọñ Edisana Spirit. Ke owo emi ama okode edinam-asana obo uduok-mmọñ Edisana Spirit, Spirit edi ntiense ke nditiñ mbe ke inua esie ke usem efen, nte ekedide ke Usen Pentecost ke ini owo 120 oro ke Ubet Enyon ekebo uduok-mmọñ Edisana Spirit, “enyuñ etonọ ndisem nsio-nsio usem, nte Spirit onode mmọ ukeme nditiñ” (Utom Mme Apostle 2:4). Ndiwut nte ke uduok-mmọñ Edisana Spirit emi ikenyeneke owo 120 oro ikpon, ama otim ayarare ke ini mme andinim ke akpanikọ ekebo Enye ke ufok Cornelius ke isua itaita ema ekebe. Mbet ema efiok ete ke mbon ufok Cornelius ema ebọ Edisana Spirit oro, “Koro mmọ ekopde nte mmọ oro esemde nsio-nsio usem, enyuñ etorode Abasi” (Utom Mme Apostle 10:46). Nko, ke isua 23 ema ekebe ke ini Paul okodude ke Ephesus, Edisana Spirit odoo ofuk otu owo ndien “Mmọ enyuñ esem nsio-nsio usem, enyuñ etiñ prophecy” (Utom Mme Apostle 19:6). Emi ikedighe enọ edisem mme usem, edi ekedi ndiwut nte ke mmọ eyoho ye Edisana Spirit. Ekeme ndidi mmọ iketokke ntak isem aba ke usem, ibokke ke mme ini eke mmọ ebode akam ndien Abasi odon mmọ.

Nditiñ Mmenere Ubọñ Abasi

Mme owo emi ekedude ke ufọk-Abasi ke Corinth ema enam ebe adaña ke enọ edisem usem emi Abasi ọkọnọde mmọ, ndien Paul ama asua ọnọ mmọ ke ntak unana ifiọk mmọ ke abaña enọ edisem usem emi. Paul ama etiñ ete edieke mme owo eke mifiọkke se mmọ etiñde edukde ke mboho mmọ, eyekere ete ke otu oro edama idat. Ọkpọfọn didie mmọ ndikpetiñ se Ọbọñ anamde ọnọ mmọ ke utọ usuñ emi kpukpru owo ekpekopde enyuñ efiọkde. Anam-idiọk eyenyene ubiom-ikpe edieke enye ọfiọkde abaña ima Christ ke abaña enye ye odudu emi odude ke Iyip Jesus ndinyaña enye nsio ke idiọk. Edieke enọde ikọ-ntiense ndinọ Abasi ubọñ, eyenam idiọk-owo ọfiọk abaña akpanikọ Abasi. Ikwo emi andikwo ọyọhọde ye nda-usuñ Spirit ada ñko ubiom-ikpe ọnọ anam-idiọk. Ñkpọ kiet ekededi emi enamde ke ini ekponode Abasi ke otu owo, enyene ndinam enye nte eyede ye ke nde ke nde edieke eyomde Abasi enyene ukpono ke esit. “Koro Abasi idighe Abasi ndutime, edi edi Abasi emi nte ido edide ke kpukpru mme ufọk mbon Abasi.”

Mme Nsu-nsu Usem

Eda ediwak nsahi enọ Eti-mbuk Jesus Christ oto ke emi ediwak owo eyomde ndisem nsio-nsio usem man ewut idaha mmọ ke ñkañ Spirit. Edisana uwem emi owo enyenede ke ndida nnam utom Abasi, ke akpa itie edi ata akpan ñkpọ; ndien Spirit Abasi iditiñke ibe ke uwem emi misanake. Edieke owo miduhe uwem eke asanade ndien eberi idem ke ikpikpu obukpo ido Abasi ye ke edisem usem nte idaha esie ke Spirit, enye ababiaña idem. “... Sia mmọ minyimeke ndibọ ima akpanikọ, man enyaña mmọ. Emi esin Abasi ọdọñ abiaña ndinam utom ke esit mmọ, ete enim nsu ke akpanikọ: man edikpe ikpe kpukpru owo emi midaha akpanikọ, edi edarade ke ukwañido” (1 Ñwed Thessalonica 2:10-12).

Spirit Abasi ye Ikọ Esie edi ukem. John, owo-mbet ọkọdọhọ ete: “ekunim kpukpru Spirit ke akpanikọ, edi edomo mme spirit ese mme mmọ edi eke Abasi” (1 John 4:1). Ñwed Abasi edi akpatre ikọ emi Abasi ọnọde owo, ndien Enye inọhọ baba obufa eriyarare efen emi ańwanade ye Ikọ oro. Abasi idinimke baba ufañ kiet inọ idiọk-ñkpọ, ndien ke esiode edisana uwem efep, baba owo kiet idikwe Abasi (Mme Hebrew 12:14).

Iban Emi Ekwọrọde Ikọ

Ke itie edikot ukpep-ñkpọ nnyin, imokot nte ewetde: “yak iban edop uyo etie suñ ke ufọk Abasi; koro iyakke mmọ etiñ ikọ; mmọ enyene ndidu ke nsuk idem, nte ibet etemedede. Edieke ọdọñde mmọ ndikpep ñkpọ ekededi, yak mmọ ebup ebe mmọ ke ufọk: Koro ọwọrọ esuene ñwan nditiñ ikọ ke ufọk Abasi.” Oto ke mme ikọ emi ediwak owo ekere ete ke ikemke ye Ikọ Abasi iban nditiñ ikọ-ntiense, ndikpep ñkpọ, ndikwọrọ ikọ me ndikama idaha utom ke ufọk-Abasi. Nte ededi, mme itie efen ke ikọ Abasi isọñọke ekikere emi. Paul ọkọnọ mbon Corinth item oro man ndutime ye idiọk edinam okuda itie ke ufọk-Abasi, ndien enye ñko ama enyene ntak ndidọhọ ete iban edop uyo, emi inimde ke akpanikọ ite ke mmọ ema esin ndutime ke editiñ ikọ ye edibup mbume.

Ke enye etiñde abaña ñkpọ emi ke 1 Ñwed Timothy 2:12, enye iketiñke ibaña iban emi Abasi ama okokot, edi eketiñ abaña mmọ emi eyomde “ndikara irenowo” nnyuñ nnam utom eke Abasi mikotke mmọ ete enam. Edi Paul ikponyimeke mmọ ekpep ñkpọ, edi ama ọsọsọ adara owo emi Abasi okokotde esin ke idaha utom, edide eren me ñwan.

Paul etiñ abaña mmọ emi enade uduọk-mmọñ eduk ke Christ ete, “Jew ye Greek ikemeke ndidu, ofin ye eyen-isọñ ikemeke ndidu, **erenowo** ye **ñwan** inyuñ ikemeke ndidu; koro kpukpru mbufo edi kiet ke Christ Jesus” (Ñwed Mbon Galatia 3:28). Prisca akadiana kiet ye ebe esie Aquila ke utom Eti-mbuk, ndien Paul ikebahakere enye isio ke utom ukwọrọ-ikọ, koro ke Ñwed Mbon Rome enye ewet ete, “Ekọm Prisca ye Aquila, mme nsaña-utom mi ke Christ Jesus” (Ñwed Mbon Rome 16:3).

Ke usen Pentecost, iban ema etiene ebuana ke owo 120 oro ke Ubet Enyọñ (Utom Mme Apostle 1:14), ndien “Edisana Spirit ọyọhọ kpukpru mmọ ke idem, mmọ enyuñ etọñọ ndisem nsio-nsio usem, nte Spirit ọnọde mmọ ukeme nditiñ”. Peter ọdọhọ ete: “Edi emi edi se prophet Joel eketiñde, ete, Abasi ọdọhọ ete, ama ekem ke ukperedem ini, Nyeñwaña Spirit Mi ndori kpukpru obukidem: Ndien nditọ-iren mbufo ye nditọ mbufo iban eyetiñ prophecy ... Ndori ifin iren Mi ye ifin iban Mi; mmọ eyenyuñ etiñ

prophecy” (Utom Mme Apostle 2:1-18). Mme itie Nwedi Abasi emi etim enam anwanwa ete ke Abasi isinke ubahare ke ufot iren ye iban. Enye ayak mme eno ye ikot Esie onno eke Enye ofiokde ete eyenam akpaniko, ke mmọ edide iren mme iban.

Ini kiet ekededi emi eyakde Spirit Abasi ada usuñ ke esit owo me ke ufok Abasi, ubahare ye enwan ididuhe. Ke Spirit adade usuñ, inem ye edidiana kiet ke mbuotidem eyedu, ndien Abasi ekeme ndinyaña mme ukpon nnyuñ nno nkori ke utom Obio Ubon Esie.

MME MBUME

1. Nso ke mbon Corinth ekenam edue ke ini mmọ ediade udia Obon?
2. Nso item ke Paul okono mmọ ke abana mme idiok odunam mmọ ke ini udia-Obon?
3. Siak ndusuk mme eno Spirit.
4. Didie ke Paul eketin ndiwut nsio-nsio idaha eke owo kiet-kiet enyenede ke ikpohidem Christ?
5. Nso idi eno edisem ke mme usem?
6. Didie ke eno mme usem okpuhore ye ntiense eke owo enyenede ke ini obode uduok-mmom Edisana Spirit?
7. Nso ke Paul eketin abana edisem mme usem ke ufok Abasi?
8. Nso idi ntak emi Paul akakpande iban nditin ikọ ke ufok Abasi?
9. Siak mme itie Nwedi Abasi emi ewutde ete ke Abasi onyime iban enam utom ke ufok Abasi.